

BOSNA I HERCEGOVINA
FEDERACIJE BOSNE I HERCEGOVINE
SREDNJOBOSANSKI KANTON
OPĆINSKI SUD U BUGOJNU
Broj: 46 0 Su 116144 24 Su 12
Bugojno, 10.02.2026. godine

Na temelju člana 31. Zakona o sudovima u Federaciji BiH („Službene novine FBiH“, br. 38/2005, 22/2006, 63/2010, 72/2010, 7/2013, 52/2014 i 85/2021), člana 8. Pravilnika o unutrašnjem sudskom poslovanju („Službeni glasnik BiH“, br. 66/2012, 40/2014, 54/2017, 60/2017, 30/2018 i 83/2022) i člana 41. Pravilnika o unutrašnjoj organizaciji i sistematizaciji radnih mjesta u Općinskom sudu u Bugojnu, predsjednica Općinskog suda u Bugojnu,
d o n o s i

PRAVILNIK ZA OBJAVLJIVANJE SUDSKIH ODLUKA, AKATA I INFORMACIJA O PREDMETIMA OPĆINSKOG SUDA U BUGOJNU

Član 1. (Predmet)

Pravilnikom za objavljivanje sudskih odluka, akata i informacija o predmetima Općinskog suda u Bugojnu (u daljem tekstu: Pravilnik) uređuje se postupak i osnovni principi objavljivanja sudskih odluka, akata i informacijama o predmetima Općinskog suda u Bugojnu.

Član 2. (Cilj)

Cilj Pravilnika jeste ostvarivanje većeg nivoa transparentnosti rada Općinskog suda u Bugojnu, ujednačavanje prakse i uspostavljanje procedura u objavljivanju sudskih odluka, akata i informacija o predmetima putem specijaliziranih web servisa.

Objavljivanjem odluka, omogućuje se da javnosti ima uvid u rad pravosudnih institucija čime se jača povjerenje u pravosudnih sistem.

Član 3. (Osnovni principi)

3.1. Javnost

Sudske odluke i drugi sadržaji o predmetima precizirani ovim Pravilnikom i aktima Suda predstavljaju javno dobro, te trebaju biti javno dostupni i redovno ažurirani.

3.2. Zaštita ličnih podataka

1) Lične podatke neophodno je obrađivati uz poduzimanje propisanih mjera zaštite, naročito cijeneći odredbe Zakona o zaštiti ličnih podataka BiH ("Službeni glasnik Bosne i Hercegovine", br. 12/2025).

2) Pravo na privatnost može biti ograničeno u predmetima od javnog interesa u skladu sa zakonima u Bosni i Hercegovini.

3) Lični podaci mogu biti objavljeni i uz izričitu pismenu saglasnost fizičkog lica, koje je prethodno poučeno o posljedicama davanja takve saglasnosti.

4) Pojedinaac čiji se lični podaci obrađuju i dostupni su javnosti, ima pravo da pod određenim uslovima ishodi brisanje tih podataka primjenjujući „pravo na zaborav“ (u slučaju rehabilitacije, brisanja sudske osude i dr.).

3.3. Tačnost i blagovremenost

1) Objavljeni sadržaj mora sadržavati tačne i blagovremene informacije.

2) Potrebno je postupati hitno prilikom obrade zahtjeva fizičkih lica za izmjenu ili brisanje objavljenih podataka, odnosno ispravku netačnih i dopunu nepotpunih podataka.

3.4. Jasnost i razumljivost

Prilikom objavljivanja sadržaja, vodit će se računa da isti budu objavljeni na način koji je jasan i razumljiv javnosti i medijima.

3.5. Kontinuitet

Potrebno je održavati kontinuitet objavljivanja sadržaja, te redovno pružati informacije o predmetima od javnog interesa.

3.6. Trajanje objave

Svi sadržaji koji se objavljuju, bit će dostupni javnosti i medijima dok se ne ostvari svrha njihovog objavljivanja, vodeći računa o pravu na zaborav.

3.7. Unifikacija objava i jednostavnost pristupa

1) Sud će unificirati mjesto i način objave sadržaja predviđenih ovim Smjernicama kako bi isti bili lako dostupni, te će isti biti objavljivani u odgovarajućim rubrikama na službenoj web stranici Suda.

2) Anonimizacija ličnih podataka vršit će se u skladu sa Uputstvom za anonimizaciju VSTV-a BiH.

Član 4. (Značenje izraza)

Proaktivna transparentnost podrazumijeva aktivno nastojanje pravosudnih institucija da informacije u vezi sa njihovim radom i postupanjem u konkretnim predmetima, a koje su od interesa za različite ciljne grupe, budu blagovremeno identifikovane i adekvatno objavljene bez ikakvog prethodnog zahtjeva za pristup informacijama.

Reaktivna transparentnost podrazumijeva postupanje pravosudnih institucija po zahtjevima za pristup informacijama, kao i postupanja po različitim upitima koji dolaze iz medija i od drugih zainteresovanih lica.

Specijalizirani web servisi - web servisi na kojima se objavljuju sadržaji u skladu sa Pravilnikom: službena web stranica Suda, centralna Baza sudskih odluka Bosne i Hercegovine, Portal sudske prakse Bosne i Hercegovine, Mapa sudskih predmeta od javnog interesa.

Anonimizacija - postupak obrade ličnih podataka s ciljem da se zaštiti identitet osobe na koju se podaci odnose, a vrši se u skladu sa Uputstvom za anonimizaciju VSTV-a BiH.

Lični podaci – svi podaci kojima se može identifikovati fizičko lice, a definisani Zakonom o zaštiti ličnih podataka BiH.

Član 5. **(Predmeti od javnog interesa)**

Predmeti od javnog interesa, a određeni Smjernicama za objavljivanje sudskih i tužilačkih odluka, akata i informacija o predmetima, su:

Krivični predmeti:

- a) krivična djela protiv čovječnosti i vrijednosti zaštićenih međunarodnim pravom,
- b) koruptivna krivična djela definisana listom koruptivnih krivičnih djela VSTV-a BiH,
- c) organizovani kriminal,
- d) terorizam,
- e) pranje novca,
- f) krivična djela u vezi sa utajom poreza,
- g) ubistvo i teška ubistva,
- h) trgovina ljudima,
- i) porodično nasilje,
- j) krivična djela u vezi sa neovlaštenom proizvodnjom i prometom opojnih droga,
- k) krivična djela iz mržnje,
- l) krivična djela protiv države i društvenog uređenja.

Parnični predmeti:

- a) diskriminacija,
- b) zaštita okoliša,
- c) autorska prava, zaštita intelektualne i industrijske svojine,
- d) rodna ravnopravnost,
- e) zaštita potrošača,
- f) stečaj,

- g) privatizacija,
- h) kolektivni sporovi,
- i) privredni sporovi sa inostranim elementom,
- j) sporovi o državnoj imovini.

Upravni predmeti:

- a) zaštita okoliša,
- b) konkurencija,
- c) koncesije,
- d) obrada podataka iz zbirke ličnih podataka,
- e) sloboda pristupa informacijama,
- f) izborne žalbe,
- g) javne nabavke,
- h) sukob interesa.

Sud će provesti test javnog interesa i u drugim predmetima rukovodeći se sljedećim kriterijima, a u skladu sa Smjernicama za objavljivanje sudskih i tužilačkih odluka, akata i informacija o predmetima:

- 1) vrsta i težina krivičnog djela kao i predmet postupka,
- 2) svojstvo učesnika u postupku (npr. imenovani/izabrani dužnosnici u sudskoj, izvršnoj i zakonodavnoj vlasti, novinari, službena lica, javna lica i sl.),
- 3) ostali opravdani interesi javnosti (npr. stepen društvene opasnosti, pojavni oblik kriminaliteta, zaštićeno dobro, značaj odluke za širu društvenu zajednicu i sl.).

Član 6.

(Odluke od značaja za sudsku praksu)

Pored predmeta od javnog interesa, imamo i odluke od značaja za sudsku praksu, a u smislu Smjernica za objavljivanje sudskih i tužilačkih odluka, akata i informacija o predmetima, time se smatraju:

- a) odluke u kojima je sud prvi put zauzeo neki stav (primjena novih zakona, novi instituti, odluke u pilot predmetima, odluke o spornom pravnom pitanju...),
- b) odluke u kojima je promijenjen ranije zauzeti stav istog suda, uključuju i odluke u kojima je sud promijenio shvatanje zbog odluke Evropskog suda za ljudska prava ili Ustavnog suda BiH,
- c) odluke koje se odnose na nove pravne lijekove,

- d) odluke u kojima je sud direktno primijenio Evropsku konvenciju za zaštitu ljudskih prava i osnovnih sloboda, ili koristio sudsku praksu Evropskog suda za ljudska prava ili drugog međunarodnog tribunala,
- e) odluke u kojima je sud primijenio međunarodni ugovor (npr. Bečka konvencija),
- f) odluke u kojima se sud pozvao na stav panela za ujednačavanje sudske prakse,
- g) odluke u kojima je dozvoljena vanredna revizija.

Član 7. **(Službena web stranica)**

Za objavljivanje sudskih odluka, informacija o predmetima koristi se službena web stranica Općinskog suda u Bugojnu.

Na službenoj web stranici će se objavljivati pravosnažne sudske odluke, te informacije o predmetima u toku.

Član 8. **(Objava pravosnažnih sudskih odluka)**

Objava pravosnažnih sudskih odluka vršit će se uz poštivanje zakona i principa definisanih ovim Pravilnikom kao i Smjernicama za objavljivanje sudskih i tužilačkih odluka, akata i informacija o predmetima, prema kriterijima:

- a) odluke od javnog interesa,
- b) odluke od značaja za sudsku praksu,
- c) odluke u kojima postoji zakonska obaveza objavljivanja,
- d) odluke za koje je iskazano interesovanje profesionalne, akademske zajednice, medija i javnosti,
- e) druge odluke koje po ocjeni suda imaju prioritet u objavljivanju.

Pravosnažne sudske odluke objavljivat će se u posebnoj sekciji web stranice Općinskog suda u Bugojnu u modulu „SUDSKE ODLUKE“, te će tu dalje biti razvrstane po oblastima i pravnim terminima.

Član 9. **(Minimum podataka koje Sud treba obezbijediti)**

Krivični predmeti:

- Naziv krivičnog djela, broj predmeta i kratki opis pravnog instituta.

Građanski, privredni i upravni predmeti:

- Podoblast, vrsta i predmet spora, broj predmeta i kratki opis pravnog instituta.

Član 10.
(Trajanje objave)

Trajanje objave treba biti ograničeno do godinu dana, osim ako svrha objavljivanja ne zahtijeva duži vremenski rok, sa primjerenim stepenom anonimizacije u skladu sa ovim Smjernicama i Uputstvom za anonimizaciju VSTV-a BiH.

Član 11.
(Informacije o predmetima u toku)

Sud će informacije o predmetima u toku, uključujući i informacije o nepravosnažnim odlukama objavljivati u formi saopštenja za javnost, u kategoriji pod nazivom ODNOSI SA JAVNOŠĆU, potkategorija VIJESTI, sekcija SAOPŠTENJA ZA JAVNOST, dok se u sekciji AKTUELNOSTI objavljuju isključivo informacije o redovnim aktivnostima suda i opšte informacije.

Izuzetno, u predmetima od javnog interesa, uz saopštenje za javnost kojim se daje informacija o nepravosnažnim odlukama, može se objaviti i izreka odluke u pdf formatu.

Član 12.
(Način i postupak objavljivanja)

1. Sud će na službenoj web stranici objavljivati pravosnažne sudske odluke i informacije o predmetima u toku.
2. Predsjednik suda ili postupajući sudija je dužan da odluku koju namjerava objaviti na službenoj web stranici suda dostaviti putem službenog e-maila, ili drugi adekvatan način, službeniku za odnose s javnošću-glasnogovorniku suda.
3. Službenik za odnose s javnošću-glasnogovornik suda dužan je dostavljenju odluku anonimizirati cijeneći odredbe Uputstva za anonimizaciju VSTV-a BiH, a u skladu sa Smjernicama VSTV-a za objavljivanje sudskih i tužilačkih odluka, akata i informacija o predmetima.
4. Nakon anonimizacije, službenik za odnose s javnošću-glasnogovornik suda odluku dostavlja predsjedniku suda ili postupajućem sudiji koji vrši kontrolu je li odluka anonimizirana u skladu sa predviđenim pravilima, te je nakon toga dostavlja web administratoru Suda.
5. Web administrator objavljuje odluku na službenoj web stranici Suda, u odgovarajuće kategorije.
6. Predsjednik suda ili postupajući sudija dužan je službeniku za odnose s javnošću-glasnogovorniku suda dostaviti informaciju iz predmeta u toku za koju smatra da je od javnog interesa i koju ima namjeru objaviti na službenoj web stranici Suda, u vidu saopćenja za javnost.
7. Službenik za odnose s javnošću-glasnogovornik suda dužan je sačinjeno saopštenje za javnost, prije objave, dostaviti predsjedniku suda ili postupajućem sudiji radi kontrole, nakon čega isto dostavlja web administratoru Suda.

8. Web administrator objavljuje odluku na službenoj web stranici Suda, u odgovarajuće kategorije.

Član 13.
(Raspored suđenja)

Zbog izuzetne važnosti rasporeda suđenja za javnost i medije, Sud će isto objavljivati u posebnu potkategoriju na službenoj web stranici – RASPORED SUĐENJA.

Navedeni podaci se čuvaju onoliko dugo koliko je potrebno da se ispuni svrha objave.

Član 14.
(Objavljivanje akata suda)

Opći akti Općinskog suda u Bugojnu, koji se donose u cilju rukovođenja i organizacije suda, objavljuju se na službenoj stranici Općinskog suda u Bugojnu, u dijelu RAD SUDA-ORGANIZACIJA SUDA-AKTI SUDA.

Član 15.
(Drugi informacijski kanali)

Sud može koristiti i druge informacijske kanale za komuniciranje sa medijima i javnosti, predviđeni Komunikacijskom strategijom VSTV-a BiH i Komunikacijskom strategijom Općinskog suda u Bugojnu.

Pravila objavljivanja određena ovim Pravilnikom, primjenjuje se i za objavljivanje putem svih drugih informacijskih kanala.

Član 16.
(Stupanje na snagu)

Ovaj Pravilnik stupa na snagu danom donošenja i bit će objavljen na službenoj web stranici Općinskog suda u Bugojnu.



Predsjednica suda
Randžana Hadžibegović Haračić

